

# ARUBA

...antes y awor...

Awendia tur mucha sa kiko ta bai "cini". Nan lo a mira mayoria di e pelicularnan di mucha. Pero prome cu aña 1919 ni grandi ni chikito no tabata sa mes kiko ta un pelicula.

Esun cu a trece cini na Aruba tabata Sr. L. J. M. "Nadi" Henriquez. Na 1919 el a instalá un casita den curá di zink patras di unda ta Fondo di Desaroyo awor. Den e casita aki el a pone un proyector cu tabata drei e pelicula y proyect'é riba un muraya blanchá. E teatro aki tabata den aire liber. Interes tabata masha grandi mes, te hasta nan tabata trece nan mesun stoel pasobra e bankinan tabata yená cu hende. Pero tur e pelicularnan tabata mudo, pues no tabata tin zonido.

Na 1920 e "cini" aki a cambia di doño. Sr. Eddy de Veer a compra esaki y a busca 2 proyector cu el a cambia pa un pianola cu su esposa a haya como regalo di bruid.

Asina famia de Veer a cuminsa e negoshi di pelicula na Aruba. E prome pelicula tabata "Pasion di Cristo".

Durante e añanan cu a sigui Sr. de Veer a laga construí un teatro, Teatro Gloria. Un edificio di palo caminda awor tin un tereno bashi den caya grandi (p'ariba di e caminda banda di Wulfsen & Wulfsen). Na 1932 esaki a wordo bashá abao pa un edificio mas moderno cu a bira Teatro Gloria Parlante, pasobra e tempo ey e pelicularnan tabata tin stem. Tabata un di e dos teatronan den region Caribe cu tabata tin stem, e otro tabata na Corsow.

Poco tempo despues e teatro a kima den oranan di anochi. E candela tabata asina grandi cu bomberonan di Lago tambe mester a bin yuda y asina e lugar a keda destrui.

Te na aña 1948 sr. de Veer a reconstuí Teatro Gloria na e mesun lugar, pero atrobe candela feroz a destrui esaki.

Sr. de Veer a dicidi cu ta basta y a bende e tereno aki y a busca un otro solucion pa su teatro.

Dia 8 di April 1950 el a inaugurá su prestigioso "De Veer Theatre" na L. G. Smith Boulevard, caminda awe ta Renaissance Mall y Crystal Casino. Pa e tempo ey tabata





Esaki ta e "de Veer Theatre" riba L. G. Smith Boulevard den añanan 1950. Despues e edificio aki a wordo renoba pa uno mas moderno y cu algun tienda, y atrobe despues di poco mas aña el a bira un mall y e theatre a muda pa Seaport Marketplace, unda e ta te awe.

tin mas teatronan riba Aruba, p.e. Teatro Rialto di sr. Tuyo Arends, Teatro Principal y Cinelandia na San Nicolas, Teatro Aurora na Santa Cruz, fuera di e teatronan mas chikito na Savaneta (esaki tabata den aire liber dilanti Marinierskazerne), Lago Heights, Esso Club y Eagle. Pero poco-poco un pa un di e teatronan aki a sera of a wordo bashá abao. Ora esun di Savaneta a sera sr. de Veer a mira e posibilidad di construi un drive-in pa esnan p'ariba di brug por mira pelicula mas cerca di nan cas, y esaki a ser realisa dia 16 di October 1969, cu e prome pelicula "Guns of San Sebastian".

Por ultimo Seaport Cinemas na Seaport Marketplace a habri su portanan dia 17 di November 1995 cu 3 sala di pelicula. Dia 17 di juli 1997 a habri 2 sala mas y algun siman despues e di 6 sala a keda habri.

E teatronan di de Veer no solamente tabata pasa pelicularnan, pero tambe artistanan di fama mundial di e añanan '40 y '50, manera Carlos Gardel, Pedro Vargas, Bienvenido Granda, y hopi mas.

Conta bon, ta 85 aña cu Aruba conoce pelicula, y mayoria di e tempo ey famia de Veer tabata esunnan cu tabata ofrece entretenimento sano pa e pueblo di Aruba.



look and feel healthy  
look and feel healthy





luvidio



# Chabalito

Number 5 - Año VI - Afl. 2,=



BIBLIOTECA NACIONAL ARUBA



3 0993 00185 643 4